

UDALEK ETA SENIDEEK URTEZAHAR EGUNEAN ANTOLATU KONTZENTRAZIOAK OSO JENDETSUAK IZAN ZIREN

Milaka lagunek presoan Euskal Herriratzea eskatuz agurtu zuten 1998. urtea

■ Kontzentrazioetan EAJ, HB, EA, IU eta Batzarreko zinegotzi eta buru askok parte hartu zuten, eta PSOEko beste zenbaitek ere bai

■ Mobilizazioetan sektore anitzetako jendea bildu zen, eta milaka izan ziren kalera irten ziren herritarrak

■ PSE-EE alderdiko hainbat alkate eta zinegotzik Euskal Herriratzearen aldeko pankartak eramane zituzten

Erredakzioa / Donostia

MILAKA herritar atera ziren kalera abenduaren 31n urteari presoan Euskal Herriratzea eskatuz amaiera emateko. Ostegun arratsaldean egin kontzentrazioetan alderdi gehientsuenetako ordezkariak bildu ziren: EAJ, HB, PSOE, EA, IU, Batzarre eta hainbat alderdi independentetako kideak.

Hiriburuei dagokienez, Bilboko izan zen manifestazio jendetsuena. Senideen arabera, 5.000 lagun bildu ziren, eta EAJko eta HBko ordezkariak bertan ziren. Manifestazioa udaletxe aurrean amaitu zen. Iruñean udaletxe plazan 2.000 lagun inguru bildu ziren. Donostian, berriz, 1.000 lagunetik gora elkartu ziren, eta aurpegi ezagun ugari ziren bertan. EAJ, HB, EA eta IUko zinegotziek gain, EAJko hainbat buru izan ziren, adibidez, Joseba Egibar, Josu Jon Imaz eta Luis Maria Bandres, baita HBko Joseba Permach Mahai Nazionaleko kidea eta Joan Mari Irigoien idazlea eta Ramon Agirre aktorea, besteak beste. Gasteizen 500 lagun inguru bildu ziren, eta Jose Angel Cuerda alkatea izan zuten buru.

Probintzietako herrietan gertatua kontuan hartuz, Araban Audio eta Aguraingo kasuak aipa daitezke. Laudion 600 lagun inguru bildu ziren, eta EAJ, HB eta EAJko ordezkariak izan ziren eta Agurainen, berriz, 300 lagun elkartu ziren eta PSOEkoak izan ezik beste zinegotzi guztiak bertaratu ziren.

Bizkaian, Elorrio, Erandio, Ermua eta Mungia dira aipagarri. Elorrian jendetza handia bildu zelako —1.000 pertsona— eta Erandio udalbatza osoa egon zelako kontzentrazioan —PSOE, EAJ, HB eta IU—. Ermuan EAJ, HB, EA eta IUko zinegotziak izan ziren eta 200 lagun inguru bildu ziren. Mungian, EAJko alkateak preso baten argazkia eramane zuen.



JAGOBA MANTETOLA

Jende ugari eta hainbat ordezkari politiko bildu ziren Donostiako kontzentrazioan eta tartean ziren Joseba Egibar eta Joseba Permach (ezkerrean).



JOSEBA OLALDE

Gasteizko kontzentrazio goizean izan zen eta bertan zen Cuerda alkatea.

Gipuzkoako herrietan izan ziren kontzentrazioak jendetsuenak. Senideen arabera, Errenterian 3.000 lagun bildu ziren, Zarautzen 2.000, Arrasaten, Azpeitian, Azkoitia, Oñatin eta Lezon 1.500 pertsona eta abar. Aniztasunaren aldetik kontzentrazio anitzak izan ziren eta PSE-EEko hainbat alkate eta zinegotzi izan ziren kontzentrazioetan, esaterako, Pasaian, Zumarragan, Urretxun Beasainen eta Andoainen

Nafarroako udalen aurrean egin ekimenei dagokienez, aipatzekoak dira Atarrabia, Leitza, Barañain, Altsasu, Etxarri-Aranatz eta Tafallako kasuak, besteak beste, nahikoa jendetsuak izan zirelako. Batzarreko zinegotziek ordezkariak duten herri gehienetako kontzentrazioetan parte hartu zuten. Bestetik, Tuteran, adibidez, Alderdi Karlistako kideek ere bat egin zuten Senideen mobilizazioarekin.



OSKAR MONTERO

Iruñean herenegun iluntzean eginiko kontzentrazioaren irudia.



PSOEko hainbat alkatek parte hartu zuten kontzentrazioetan. Argazkian Bixente Itxaso Pasaiaiko PSE-EEko alkatea.